



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

INDEKS HARGA PENGELUAR (IHPR) PENGELUARAN TEMPATAN, MALAYSIA JUN 2025

Indeks Harga Pengeluar Malaysia menurun 4.2 peratus pada Jun 2025 disumbangkan oleh semua sektor

PUTRAJAYA, 28 Julai 2025 – Indeks Harga Pengeluar Malaysia yang mengukur perubahan harga di peringkat pengeluar, terus menurun 4.2 peratus pada Jun 2025, selepas penurunan 3.6 peratus pada bulan sebelumnya. Ini dilaporkan dalam laporan bulanan terbaharu **INDEKS HARGA PENGELUAR (IHPR) PENGELUARAN TEMPATAN, JUN 2025** diterbitkan oleh Jabatan Perangkaan Malaysia.

Ketua Perangkawan Malaysia, Dato' Sri Dr. Mohd Uzir Mahidin, menekankan, "Semua sektor mencatatkan penurunan tahun ke tahun pada Jun 2025, dengan sektor Perlombongan dan Pembuatan menjadi penyumbang utama kepada trend negatif keseluruhan indeks. Sektor Perlombongan menurun 8.0 peratus (Mei 2025: -15.0%), dipengaruhi oleh penurunan dalam indeks Pengekstrakan gas asli (-12.0%) dan Pengekstrakan petroleum mentah (-6.7%). Pada masa yang sama, sektor Pembuatan susut 4.3 peratus (Mei 2025: -3.0%) disumbangkan oleh penurunan ketara dalam indeks Pembuatan kok dan produk petroleum bertapis (-17.7%) dan Pembuatan komputer, produk elektronik dan optikal (-7.8%). Sektor Pertanian, perhutanan & perikanan turut mencatatkan penurunan sederhana 0.3 peratus (Mei 2025: 1.8%), dengan indeks Pengeluaran ternakan turun 2.9 peratus. Bagi sektor utiliti, kedua-dua sektor Bekalan elektrik dan gas dan Bekalan air mencatatkan penurunan marginal 0.2 peratus pada Jun 2025.

Dato' Sri Dr. Mohd Uzir Mahidin menjelaskan lagi, "Pada asas bulan ke bulan, IHPR Pengeluaran Tempatan mencatatkan penurunan sebanyak 0.7 peratus pada Jun 2025,

selepas penurunan 1.1 peratus pada bulan sebelumnya. Sektor Pembuatan susut 1.2 peratus (Mei 2025: -0.5%), disebabkan oleh penurunan dalam indeks Pembuatan kok dan produk petroleum bertapis (-4.2%) dan Pembuatan produk makanan (-3.0%). Sektor Pertanian, perhutanan dan perikanan juga mencatatkan penurunan 1.0 peratus (Mei 2025: -5.4%), disebabkan oleh penurunan dalam indeks Penanaman tanaman kekal (-1.2%) dan Pengeluaran ternakan (-0.8%). Sebaliknya, sektor Perlombongan meningkat 4.6 peratus, meningkat daripada penguncupan 2.3 peratus pada Mei 2025. Peningkatan ini didorong oleh Pengekstrakan petroleum mentah yang meningkat sebanyak 7.0 peratus. Sementara itu, indeks Bekalan air meningkat marginal 0.2 peratus, manakala indeks Bekalan elektrik dan gas menurun 0.2 peratus pada Jun 2025.”

Mengulas lebih lanjut mengenai IHPR Pengeluaran Tempatan mengikut peringkat pemprosesan, Ketua Perangkawan menjelaskan, “Semua peringkat pemprosesan mencatatkan penurunan tahun ke tahun pada Jun 2025, meneruskan trend penurunan sejak Mac 2025. Indeks Bahan mentah untuk diproseskan selanjutnya menurun 5.8 peratus, didorong oleh penurunan dalam Bahan bukan makanan (-7.0%). Indeks Bahan perantaraan, bekalan dan komponen pula mencatatkan penurunan 4.4 peratus, disumbangkan oleh penurunan ketara dalam Bahan api yang diproses dan pelincir (-12.7%). Sementara itu, indeks Barang siap pula menguncup 2.3 peratus, terutamanya disebabkan oleh penurunan dalam Kelengkapan modal (-3.2%).”

Pada asas bulanan, indeks Bahan mentah untuk diproseskan selanjutnya mencatatkan peningkatan 1.2 peratus, manakala Indeks Barang siap merekodkan kenaikan perlahan 0.5 peratus. Namun begitu, indeks Bahan perantaraan, bekalan dan komponen mencatatkan penurunan sebanyak 1.8 peratus.

Ketua Perangkawan Malaysia turut menambah, “IHPR Pengeluaran Tempatan mencatatkan penurunan 3.7 peratus pada suku kedua 2025, berbanding penurunan 0.3 peratus pada suku pertama 2025. Sektor Perlombongan mencatatkan penurunan ketara 13.7 peratus, diikuti oleh sektor Pembuatan (-3.4%) dan Bekalan elektrik dan gas (-0.6%). Namun begitu, sektor Pertanian, perhutanan dan perikanan dan Bekalan air masing-masing mencatatkan peningkatan sebanyak 1.4 peratus dan 0.2 peratus. Sementara itu, perbandingan suku tahunan, IHPR mencatatkan penurunan 2.3 peratus, berbanding peningkatan 1.0 peratus yang direkodkan pada suku sebelumnya. Penurunan ini didorong terutamanya oleh penguncupan dalam sektor Pertanian, perhutanan dan perikanan, Perlombongan dan Pembuatan.”

Perbandingan antara negara terpilih menunjukkan pelbagai trend IHPR bagi Jun 2025. IHPR Amerika Syarikat meningkat 2.3 peratus, berbanding peningkatan 2.7 peratus pada bulan sebelumnya. IHPR Jepun meningkat 2.9 peratus, peningkatan sederhana berbanding 3.3 peratus pada sebelumnya disumbangkan oleh Minuman dan makanan, Jentera elektrik dan Produk logam. Sebaliknya, China terus mencatatkan deflasi pengeluaran di mana IHPR turun 3.6 peratus, selepas mencatatkan penurunan 3.3 peratus pada Mei 2025. Ini merupakan bulan ke-33 berturut-turut deflasi di peringkat pengeluaran, dipengaruhi oleh penurunan bermusim harga bahan mentah. IHPR Thailand jga turun 4.0 peratus, berbanding penurunan 3.7 peratus pada bulan sebelumnya. Ini merupakan bulan keempat berturut-turut negatif inflasi pengeluaran tahunan yang memaparkan trend seperti Malaysia.

Bercakap mengenai harga komoditi terpilih Malaysia, Dato' Sri Dr. Mohd Uzir Mahidin menambah, "Menurut Bank Dunia, purata harga minyak mentah Brent pada Jun 2025 adalah USD 71.45 setong, meningkat daripada USD 64.21 setong pada bulan sebelumnya. Peningkatan harga ini didorong terutamanya oleh ketegangan geopolitik yang semakin memuncak, khususnya konflik di Timur Tengah. Selaras dengan itu, Bank Dunia telah menyemak semula unjuran purata harga Brent bagi tahun 2025 kepada USD 72 setong, lebih tinggi daripada unjuran sebelumnya. Sementara itu, harga purata minyak sawit mentah Malaysia pada Jun 2025 adalah RM3,969.00 setan berbanding RM 3,880.50 setan pada Mei 2025. Aliran peningkatan ini disokong oleh permintaan global yang kukuh, terutamanya dari India dan China, yang membantu mengekalkan harga walaupun bekalan yang mencukupi."

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia

Embargo : Hanya boleh diterbitkan atau disebarkan mulai jam 1200, Isnin, 28 Julai 2025


Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Peratus Perubahan Indeks Harga Pengeluar (IHPR) Pengeluaran Tempatan, Malaysia




Carta 2: Peratus Perubahan Indeks Harga Pengeluar (IHPR) Pengeluaran Tempatan mengikut Sektor (Tahun ke Tahun), Malaysia




Carta 3: Peratus Perubahan Indeks Harga Pengeluar (IHPR) Pengeluaran Tempatan mengikut Peringkat Pemprosesan (Tahun ke Tahun), Malaysia



Carta 4: Peratus Perubahan Indeks Harga Pengguna (IHP) dan Indeks Harga Pengeluar (IHPR) bagi Negara-Negara Terpilih (Tahun ke Tahun)





Sumber: Laman web rasmi *National Statistical Offices (NSOs)* terpilih

Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
28 JULAI 2025**